

欽  
定  
全  
唐  
文

欽定全唐文卷四百十五目錄

常袞六

大厯四年大赦天下制

大厯五年大赦天下制

大厯七年大赦天下制

大赦京畿三輔制

赦京城內囚徒制

批李夷簡賀御撰君臣事迹屏風表

答元和南省請上徽號表

答請上尊號第三表

元宗答顏真卿賀肅宗卽位表

冊新羅王金乾運文

冊崇徽公主文

賀冊皇太后表

中書門下請冊貴妃表

代宗讓皇太子表

中書門下賀雪表

中書門下賀雨第一表

第二表

第三表

中書門下賀日當蝕不蝕表

賀歲除日太陽不虧表

中書門下賀慶雲見表

中書門下賀太原紫雲見表

欽定全唐文卷四百十五

常袞

六

大厯四年大赦天下制

勅至理之代先德後刑上歡心以臨下下忻然而奉上禍  
亂不作法令何施去聖久遠薄於教化簡書填委獄訟煩  
興苛吏舞文寃人致辟思欲刷恥改行厥路無由豈天地  
父母慈愛之意也朕主三靈之重託羣后之上夕惕若厲  
不敢荒寧內訪卿士外咨方岳日不暇給八年於茲而大  
道淳風鬱而不振四郊多壘連歲備邊師旅在外役費尤

廣賦輿輸轉疲耗吾人困竭無聊窮斯濫矣下愚闇昧不見刑網戎士在軍未習法令犯禁抵罪其徒實繁幽繫狴牢未詳事實吏議不決動淹時序傷沮和氣屢彰咎徵此皆朕之不明教之未至上失其道而繩下以刑敢不罪已以答災眚且人者君之支體害之則君有所傷刑者教之輔助失之則人無所措慮有冤濫慘然憂傷用明慎罰之典俾宏在宥之澤其天下見禁囚徒死罪降從流流已下罪釋放其左降官及流人并移隸等並予量移仍委所司卽勘責送名中書門下奏聽進止如聞州縣官比年率意

恣行麤杖不依格令致使殞斃深可哀傷頻有處分仍聞  
乖越自今已後非灼然蠹害者不得輒加非理仍委觀察  
節度等使嚴加捉搦勿令有犯如違錄名奏聞量情科貶  
宣示中外宜悉朕懷

### 大厯五年大赦天下制

門下惟辟奉天作人父母若天垂戒於上人不安於下則  
修德勤政以達至誠恤刑獄之寃滯問閭閻之疾苦招納  
諫諍訪求賢良允迪前烈率由茲道朕獲承宗廟之重託  
於王侯之上夙夜齋慄莫敢荒寧推誠以撫萬邦屈己以

安百姓憂勤之至日慎一日服御之給損之又損而涉道  
猶淺燭理不明國經王度多有廢闕加以寇戎驟犯軍國  
煩勞賦重人竭因之歲歉田荒業廢逋散相仍每深怵悼  
頻有蠲降兼亦簡求良吏以惠矜人除去奸兇用達幽枉  
大變風俗更張刑政冀人和之漸洽何天眚之屢彰固以  
朕德之寡昧化之衰薄其咎不遠在予一人亦由郡邑之  
政未盡條理或貪以害物或擾以傷農有凌弱暴寡之寃  
有不均失中之政人無所措多陷刑辟蓋上之教道未至  
豈忍以文法繩之慘然憂嗟深自引慝雖靡草麥秋之候



方斷薄刑而薰風長養之時宜寬庶獄大決疏網與之更新其天下見禁囚徒死罪並降從流流已下並釋放內外文武官及前資官六品以下并草澤中有碩學專門茂才異等智謀經武諷諫主文者仰所在州府觀察牧宰精求表薦如所由搜揚未盡遺逸林間者卽宜詣闕自舉親當策試量能擢用朕每覽漢文詔書至陽和之時草木羣生之類皆有以自樂而吾百姓或貼於死亡而莫之省緬然遐想感歎增懷哀今之人又甚於昔思有贍恤俾安其居觀察節度使及刺史各宜訓勵所部使奉科條變貪官之

節激循吏之行其清白明著政理殊尤者具以名聞必加  
獎擢若冒於貨賄紊我綱紀切宜糾摘當峻刑憲其官人  
犯賄經恩免罪者並宜申報中書門下及所司不得容其  
却上自王室多故積有歲時皆我文武之臣中外戮力今  
天下既定崇德報功與之剖符傳代不絕至於蒞官述職  
各宜明慎典刑貽慶子孫永同休戚於戲武德貞觀之間  
有若魏徵王珪李靖李勣房元齡杜如晦等扶翼大運勤  
勞王家尊主庇人匪躬致命咸有一德格於皇天緬然長  
懷風烈猶在其後嗣沈翳特加優獎如廟宇荒毀卽宜修

葺無德不報何日忘之其鰥寡孤獨老幼貧窮不能自存者委州府縣吏取諸色官物量事賑給抑招攜戶口勸課農桑應所在州府有興功役處非灼然急切者宜並停之四瀆五岳名山大川神明所處風雨是主宜委中書門下分使致祭以達精誠孝子順孫義夫節婦事跡明著者特加旌表頒示中外知朕意焉主者施行

大厯七年大赦天下制

門下濟於道者化醇而刑措善於理者網舉而網疏朕涉道未宏燭理多昧嘗亦遐思太古高揖元風保合太和在

宥天下蓋德薄而未臻也是用因時以設教便俗以立防  
務盡平恕用申哀恤又教淺而多犯也加以邊虞未戢井  
賦猶繁荒療之際寇攘斯起遂令園土嘉石之下積有累  
囚危章互簡之中困於法吏屬盛陽之候大暑方蒸永念  
狴牢何堪鬱灼所以沮傷和氣感致咎徵天道人事豈相  
遠也如聞天下諸州自春以來咸愆時雨首種不入宿麥  
未登哀此矜人何恃不恐皆由朕過益用懼焉惕然憂嗟  
深自咎責所以悉減常膳別居齋宮禱於神明冀獲嘉應  
仲夏之月靜事無刑以助晏陰以宏長養斷薄決小已過

於麥秋繼長增高宜順乎天意可大赦天下其大厯七年五月十五日昧爽已前已發覺未發覺已結正未結正應天下見禁囚徒罪無輕重一切悉宜放免所由更不須類例聞奏宜令諸道節度觀察及諸州牧縣宰於當管內所  
有名山靈跡各精誠致祭祈降甘澤冀獲豐稔永思流弊庶振風猷其巴南諸州仍歲水旱迫於凍餒或至流離因有剽求苟全性命懼刑網之所及姑嘯聚以相依抑有由焉蓋非獲已永言其弊用軫於懷如能相率來歸各安生業並無所問咸許自新敢以赦前事相告言者以其罪罪

之亡命山澤挾藏軍器百日不首復罪如初赦書日行五百里宣示中外咸使聞知主者施行

大赦京畿三輔制

門下古者以季春之月布德行惠恤刑振乏朕親執犧牲玉帛獲奉於上帝神祇九年於茲矣克已思理明不能燭昆夷未敘王畧猶虞歲會三秦之師日有千金之費悉索敝賦疲於餽軍侯甸之間徵求耗竭百穀翔貴關中小歎窮則斯濫安能懼刑因而成盜多有犯法至於軍戎之士致使廩賜不充因之逃亡抵於邦憲事非獲已情亦可察

迫以露濡之感明發有懷屬禁烟之令節方薦鮪於寢園  
聖祖敷佑景靈告祥先天後天載荷嘉貺以陰以雨又助  
發生固宜順曲成之仁布惟新之命赦罪育物曠然滌除  
其京兆府及三輔并京城內諸司諸使見禁囚徒犯死罪  
已下特宜釋放其有犯未發覺者罪無輕重亦宜一切放  
免如有妄論告者以其罪罪之其官典犯贓不在免限頃  
者魚朝恩夙有功勲委之戎事而徵求黎庶空竭閭閻加  
之廣有貿易奪人賄利京城之內擅致刑獄恣行忍虐幽  
執無辜部領帥人乖於撫馭資糧刻薄勞役煩苛惡稔疊

盈自嬰沈痼念其勲舊許以優閒令罷兵權遂其養疾而宗社降鑒神明所殛羸瘵不起旋至斃亡旣往無追一切不問所管將士等同坐於王事各効忠勤是朕爪牙自致勲業竝宜仍舊勿有憂懼蓋以朕誠乖感物明未知人失於授任而臻此也今則虛懷引咎親御禁戎特加優寵以表勞績其資聖寺禁人并追捕勘責等卽宜並停然以王畿艱弊矜恤疲人蠲稅罷徭與之休息尚恐流傭罕復貧弱未安益用憂勤諒資損約京兆府百姓承前應欠負官物等委所由勘責實在百姓腹內者一切放免其在所由



腹內者不在放限畿內官人手力資課及府官充職掌名額稍多所有祇供不免煩費並諸縣郵遞路次館驛諸色徵科等一物已上並委中書門下與京兆尹卽會計責取色目一一商量條件處置務令減省以息煩勞其諸司諸使迴易一切並停不急之務亦宜且罷農隙之後照準常式宣示中外知朕意焉

赦京城內囚徒制

門下朕以寡薄獲守丕圖恭默思道克謹天戒常恐至誠不達景化未敷寅畏之誠寢興在慮自純陽用事靈雨僊

旬麥雖有秋禾未嘗蔽有阻三農之候將貽百姓之憂是用齋心滌思禱於上下神祇雲從自郊月未離畢膏澤不降憂勤益深雖水旱成災陰陽恒數而政刑失中或致僣伏豈簡孚有爽哀敬未誠歟嗟我矜人陷於刑辟當炎蒸之序在縲紲之中久積幽冤有傷和氣所以引成湯之六事過實在予寬大禹之九刑誠存育物期於作解以救如焚其京城見禁囚徒死罪降從流流已下罪一切釋放仍委中書門下卽疏理處分訖奏聞雖赦罪從輕或謂之長惡宥過無小寧失於不經庶空夏臺用緩秋典宣示中外

令知朕意

批李夷簡賀御撰君臣事跡屏風表

省表具知朕思求理化親聞典墳至於去邪納諫之規勤政慎兵之誠取而作鑒畫以爲屏與其散在圖書心存而景慕不若列之繪素目覩而躬行庶將爲後事之師不獨觀古人之象卿詞彰順美義見忠規省覽再三深叶朕意所賀知

答元和南省請上徽號表

省表具知朕纘嗣鴻業託於王公之上常恐涉道猶淺燭

理未明夙夜祇畏罔或寧逸至於法天象以垂制順人心而平亂立刑辟而不峻興禮教而不倦簡出澆浮延納忠直思濟於道保合太和今寰海削平載橐弓矢皆賴於輔弼之臣盡規於左右將帥之畧宣力於邦家循省表章請崇徽號武功文德揚美於予用愧於懷何以及此尚以昆夷未敘邊鄙猶虞不果允從宜斷來表

答請上尊號第三表

省表具知昔我祖宗每崇徽號皆以道侔天地澤被生靈故請之不疑而受之不愧是謂典禮鴻光赫然朕以寡昧

祇承寶位寅恭惕勵不敢荒寧常懼理化未敷非以自尊  
爲意若蕩清寇孽修舉政刑此乃中外英賢叶心所致況  
復前疏亦已言之卿等善則稱君過陳功德表章三至益  
愧於懷豈大體之必然何懇言之不已沈吟終日未果允  
從

元宗答顏真卿賀肅宗卽位表

省表具知兇逆亂常侵侮中夏曩者潼關失守京國不寧  
朕因涉岐梁至於巴蜀遂命皇帝肇登寶厯爰靜妖氛今  
官軍益振回紇效款卽議南行共爲翦滅卿忠惟奉國孝

則保家懷不二之心秉難奪之操皇帝累申寵命兼以崇班宜有懋於深恩且用光於重寄

冊新羅王金乾運文

維大厯三年歲次戊申正月朔二十八日皇帝遣某官某乙持節冊命曰於戲建萬國者不獨於中夏嗣一姓者必求於令德咨爾新羅王金英憲男乾運爰自祖宗撫有東表克生明懿載茂勲伐采章文物久沿華風忠敬孝恭率由純性用蕃君子之國能執外臣之禮夫繼代之重擇賢而授是用建爾冢社祚於青邱敬其所守纂其舊服忠以

奉上惠以撫下永修東蕃之職無替先君之命肅膺典禮可不慎歟

冊崇徽公主文

維大厯四年歲次己酉五月戊辰朔二十四日辛卯皇帝若曰於戲魯邦外館有小君之儀漢室和親從閼支之號命公主而疏邑以封煥於徽章抑有前範咨爾第十女稟秀雲漢增華女宗卓爾洵淑迴然昭異肅雍之道能中其和綽麗之功自臻於妙不資姆訓動會禮經甫及初笄之年眷求和鳳之對用開湯沐方戒油韉我有親鄰稱雄貴

部分救災患助平寇虞固可申以婚姻厚其寵渥況有誠請爰從歸配是用封曰崇徽公主出降回紇可汗冊曰可敦割愛公主嬪於絕域爾其式是聞則以成婦順服茲嘉命可不慎歟

賀冊皇太后表

臣某言伏見八月二十六日制冊上皇太后尊號凡在生靈不勝慶幸臣聞天地之經所固者本聖人之德無加於孝故紹休以受命榮號以歸尊是用慶善奉慈因親教愛也伏以皇太后法象太極是生兩儀光昭上元以母萬物



塗山降瑞華渚呈符照臨典禮示天人之慶範裁成風化  
表戚屬之宗師詩云思齊大任文王以聖則知祚我仁慶  
誕興睿哲穆穆明明有自來矣伏惟聖神文武皇帝陛下  
以皇道還淳以文明致理行三代之典教備兩漢之威儀  
逾年改元謁告清廟永言配命殷薦圉丘大孝通於神明  
至化被於寰宇瞻戀慈訓尚未遑安虔奉徽章以崇位號  
嚴恭前殿陳布外朝萬國在庭千官執禮冕旒端拱翼翼  
烝烝候金冊以拜興承瑞寶而俯受聖理之至其道大光  
朝野同歡臣妾有恃言念舊黨遂及姻聯褒德以殊榮推

恩以序進華胄增貴外家益尊固可以感動靈祇懷服戎狄豈止德教加於百姓仁厚及於九族而已宜其煥列青史昭播鴻猷億萬斯年以承多福臣所守有限不獲稱慶闕庭無任抃躍忻悅之至謹遣某官奉表陳賀以聞

中書門下請冊貴妃表

臣某言臣聞天文次星配以妃位帝宮內職守在王化視公卿而命秩思賢才以審官蓋五禮之宗六義之本也伏惟寶應元聖文武皇帝陛下紹典文武屬當多難一日萬務親紆聖心初定羣兇尚多闕典紫庭分理頃刻未遑彤

管記言因茲而缺然則奉若天道以陰而助陽御於家邦  
由中而及外今旣三靈叶泰四海永清宜舉舊章以行盛  
禮竊承壺制未正等威當熊之德或聞於蘭殿貫魚之序  
無別於椒房固以叶周南之風參虞汭之化豈使坤儀曠  
其取法陰教闕而不修雖則簡在宸衷安敢默於誠請伏  
冀大明禮秩俾率宮庭以厚人倫以風天下庶得外朝均  
政羣望獲從無任懇款屏營之至臣某誠惶誠恐頓首頓  
首謹言

代宗讓皇太子表

臣某言臣聞君父之命誠不合辭臣子之心固無所隱隱之則有累天鑒辭之則有負國貞在無隱而不言雖稟命而非孝臣所以省躬審分讓德推賢慙懇上聞冒嚴亟請丹誠罔感皇睠未昭戰兢失圖精爽飛越臣某誠惶誠恐頓首頓首伏以國之上嗣古曰元良觀象於天應前星之環極取法於地視少海之朝宗必訪著龜以承主鬯臣幼非樂善長未好儒慈獎特深愚蒙不易教之羽籥有味樂章訓以詩書終迷義府遊虧四老才乏五官人莫係心德非守器頃者外統羣帥內錄尚書竊懼任崇以憂官謗今

謬塵博望猥辱壽春位登青宮禮絕朱邸且乖人望載黷  
朝經循名責實未足承天之序捨長立賢亦猶行古之道  
伏惟陛下博求公議允納微誠更擇溫文俾膺繼紹遠想  
伯夷之讓用升季歷之材則至公大行天下幸甚無任懇  
迫屏營之至謹奉表陳讓以聞臣誠惶誠恐頓首頓首

中書門下賀雪表

臣子儀等言臣聞聖人昭事以奉時乾道下濟以成物伏  
惟寶應元聖文武皇帝陛下勤勞庶政憂濟萬邦念生靈  
之未康慮兵食之不足恭默寅畏齋於穆清減膳徹樂以

祈元造天人合應雨雪呈祥在登臺視朔之辰飄灑盈尺  
俯獻歲發生之節飛舞驚春太素混成浩然萬里申子之  
瑞載表於昌期春秋所書亦先於農事重陰益固應水澤  
腹堅之時積潤潛通迎土膏脈起之候靈貺斯在豐年可  
知佇登來薌不暇祈穀侍臣相慶野老同歡臣謬奉中樞  
獲覩嘉慶無任忭躍之至謹奉表陳賀以聞臣子儀等誠  
歡誠喜頓首頓首

中書門下賀雨第一表

臣某言臣一昨奏對親承聖旨以旬期少愆春雨未降雖

去冬積雪宿麥頗滋閏年之候農耕未晚甫當薦鮪之月  
爰及禁火之辰紫陌揚塵青郊晦色日勞聖念恐失人時  
虔於龍堂親行齋禱德音朝發甘澤夕零霖霖散於城池  
芳菲遍於草樹四遠皆浹羣情共歡昔在聖人祭則受福  
必以精意通於神祇伏見陛下每發聖心未嘗無應與天  
合德所感昭然慶悅之深倍萬恒品無任慶忭之至

## 第二表

臣等言臣聞王者應天以實禮神以誠則其祥大來所榮  
必速伏惟寶應元聖文武皇帝陛下端命上帝陰騭下人

大哉洋洋發育萬物一風一雨必經於憂勞惟精惟微久  
存於齋禱自立春之後膏澤頻滋宿麥方蘇首種不入百  
穀皆賤羣黎稍安屬盛德在火之辰恐散陽流輝之亢小  
僊旬候則失人時乃命尹京載明祀典飭三輔之屬吏修  
百縣之大雩陛下又於龍祠躬自祈請雖田事未廢而皇  
情過勤意纔發而氣蒸令始降而雲合寧止西郊之密且  
有南山之濟霈然時行不冒海表浹辰而霽更說羣心擢  
芒之蕃將豐於夏薦流根之潤佇合於秋成固使我倉如  
陵萬億及種軍國是賴朝野同歡多福殊休莫盛於此臣



等謬塵樞近喜倍恒情無任慶忭之至

### 第三表

臣某言臣聞春秋龍見而雩以其盛德在火萬物炳然陽  
驕而旱也周禮所以修一縣之大祀命三公以卜郊則知  
古之勤雨首於是月蓋聖人順天以垂訓王者奉時以告  
虔伏惟寶應元聖文武皇帝陛下憂勤庶政寅畏上元全  
萬物而曲成恐一夫之不獲嘉生是降率土皆穰又自春  
以來膏澤相繼禾方長茂猶潤纖莖麥且擢芒仍涵秀色  
及純陽用事流輝是憂未失旬期已勞聖慮勉農祈穀合

樂園丘感上帝之儲祉顧蒼生之提福祭之明日夜合層  
雲微風旣和震電不作靄然四合滂灑終朝動乾坤而滿  
盈洽陰陽之化育郊原益茂田稗皆登俯觀秋至之收佇  
廣歲成之望自朝及野咸慶時和比肩鼓腹空迷日用臣  
謬參衮職久荷鴻私仰聖澤之無涯愧生成之未答無任  
忭躍之至謹奉表陳賀以聞

中書門下賀日當蝕不蝕表

臣某言伏見徐承嗣奏今月一日法當日蝕時有澍雨者  
臣聞日之所躔行有虛道至之所會蝕亦無災況聖以合

天德以禔福是有幽贊宜於感通伏惟寶應元聖文武皇  
帝陛下協用五紀順用三極厯象日月統和陰陽迺者疇  
人推策合朔於辰非正陽之所忌於大明而何損猶能懼  
而勤政實以應天齋於穆清益用恭默精誠所達元運相  
符圓尺之影始生於海上膚寸之雲忽遍於天下霈然而  
起豈止終朝莫測應龍之外潛復跋鳥之次伐鼓用幣悉  
罷於有司潤物蕃生普歡於在野及乎睿宿更益清光同  
道相避則聞昭子之對當交而變果徵劉邵之言古今殊  
祥中外所慶臣等謬陪近侍喜萬恒情無任抃蹈謹表

賀歲除日太陽不虧表

臣聞惟德動天其應如響日月交會數之常也交而不蝕德所感也伏見有司奏今日午正後七刻太陽初虧未正後三刻復滿者是日也高天無雲太陽不掩訖於申酉光彩逾明萬寓同瞻百物協慶伏以聖人者合天地以爲德與日月以爲明當虧而不虧明足見矣當應而遂應神不欺矣伏惟陛下德本於孝動由於禮勤儉以厚下寬仁以愛人憂庶政而疚懷求眾善如不及行之於下土升聞於上帝無遠不屆感而遂通一人有慶三光薦祉昔唐虞至

化而星辰不孛日月不蝕以今方古千載同貺大禮元辰  
在於明發俯逼惟新之運彌彰不掩之祥人事天心何其  
允協潛輝散彩愈曜於朱城麗景臨空轉明於黃道凡在  
生類同知聖猷無任踴躍之至

中書門下賀慶雲見表

臣某言伏見太史奏今月十三日降誕之辰有慶雲見自  
卯及巳五色相輝京城士庶無不觀覩者臣聞應天者聖  
降必有期從龍者雲感而成瑞伏惟寶應元聖文武皇帝  
陛下啟我昌運本乎太微甲觀畫堂以書有慶赤光紫氣

以表祥符每歲孟冬內朝舉禮萬國稱賀羣臣獻壽紛委  
靈貺總集良辰今者慶雲表祥史冊十月良月遠膺盈數  
之期後天奉天近叶下元之厯從風蕭索抱日紫迴色涵  
流渚之虹影雜繞樞之電交映榮光曲成轉蓋萬物皆覩  
羣情共歡無疆之休永永提福臣奉觴慶賀於萬斯年無  
任抃躍謹奉表陳賀以聞

中書門下賀太原紫雲見表

臣等言伏見太原尹北都留守檢校工部尚書薛兼訓奏  
忻州七聖廟內尊容奉勅移太原府紫微宮安置昨正月

二十九日啟告其時有紫雲見兼金奏之聲者臣聞廟貌尊嚴所以追孝天地明察則必垂祥伏惟皇帝陛下全聖人之至德合神道之設教受天之命嚴龔奉先明發有懷載感於文武非食致美必誠於宗廟序五位而禮順刑四海而化光茲以聖靈在天緬慕增惕是有象設不忘哀矜永念興王之地如聞樂沛之言遠自方州遷於京邑克配上帝高居紫微當其撰吉之時爰有奉章之請百神紛委萬靈朝拜雲浮瑞色樂協薰風已含氣於潛龍更和響於翔鳳用彰莫大之孝以嗣無疆之厯雖周室之旣受多祉

欽定全唐文

卷四百十五

天

漢朝之屢獲嘉應未有祖禰丕祐天人合符若斯之盛也  
臣無裨政事但慶鴻休不勝抃躍之至謹奉表陳賀以聞



欽定全唐文卷四百十六目錄

新文藝出版社藏

常袞七

賀收涇州表

賀納諫表

爲宰相賀連理木表

中書門下賀芝草嘉禾表

中書門下賀芝草表

中書門下賀醴泉表

中書門下賀文丹國獻白象表

賀白鼠表

李採訪賀收西京表

賀劔南破西蕃表

賀破山南賊表

爲崔中丞賀討田承嗣表

賀張獻恭破賊表

賀聖躬痊復表

百官賀佛放光表

中書門下賀抑情復膳表

李採訪請駕停金牛一日表

爲宗正卿請復常膳表

中書門下請進膳表

請入湯表

爲代宗告謝九廟表

欽定全唐文卷四百十六

常袞

七

賀收涇州表

臣某言中使王開諫李重芝等至伏奉勅旨送吐火邏王子并曹義臣家口共四十四人配漳泉等州安置伏聞大破兇醜收復涇州梟斬帥劉元等傳送闕下餘黨悉降西陲底定凡在臣庶不勝慶悅臣聞聖人有作神契必先用彰睿謀小有邊患以威天下大告武成因茲斬闕罔不率俾伏惟聖神文武皇帝陛下德合天地明罰以法雷霆道

符炎黃有征以懲姦宄蠢茲狂狡敢拒封圻梟獍之心不  
知恩愛豺狼之性輒肆傷殘聖慈以元造曲成神武不殺  
時寬嚴旨頻許自新益用恣睢竟無悛革然夏后之征扈  
氏召六卿以龔行周文之伐密人示萬邦以整旅咸在侯  
甸之內亦効訓誓之勤於是我伐用張親授經畧而執迷  
不復雖困猶鬪暫假游氛尚稽靈誅皇赫斯怒天威振耀  
簡車馬以大閱命將帥以長驅飛舞梯衝瞰臨壁壘兇徒  
悚慄義士激昂梟懸渠魁檻送支黨上以告清廟下以布  
遐方人神豁憤朝野大慶百二之塞外虞解嚴十萬之師

餘勇可息則日月所照敢不來庭戎夏大同期於指掌臣  
謬承重寄喜萬恒情無任慶躍之至謹奉表陳賀以聞

賀納諫表

臣某言伏以補闕姚南仲和士幹等上封事恩命特與改  
官及進階兼賜章服又內常侍吳承倩奉宣聖旨令兩省  
供奉官數論得失無有隱諱者德音霈然公讜知勸羣情  
震喜中朝動色易曰感人心而天下和平今之所感可謂  
深矣臣謬當丞弼之任不能有所啓聞踧踖自慚惶汗失  
次然以聖德之宏納天聽之宏博忻奉踴躍不勝大慶臣

聞從諫則聖帝之德也有犯無隱臣之分也故上聞逆耳之忤受而不疑下有殺身之益死而無悔禮曰天子齊戒受諫又曰近而不諫則尸利帝道其盛於有虞書之美舜則曰嘉言罔攸伏萬邦咸寧王道莫過于有周詩之頌文則曰思皇多士惟周之禎漢家雜之以霸亦詳延極諫訪求得失國朝稽合皇道肇修人紀貞觀故事布在典章危言正論聞於天下陛下以欽明御歷紹休祖業仁聖廣大天覆地容求賢進善有如不及每覽羣臣奏議日旰忘勞穆然嘉納不令夙退順顏者必遠忤旨者必容而芻蕘之

可擇庶藜藿之兼採少有所補從之如流雖委輅論都即日西行伏車頓首路迴乘輿方之於今未云其速而又渙發宸旨宣導近臣直言者賞之於朝罷奏者責其所職以明沮勸大悅人心則太平雍熙之化溥將四表矣可以動天地可以服戎夷雖上古至理納諫達聰坦然不諱未覩今日之盛也望請宣付史官光垂帝錄臣職任潤色敢揚鴻休無任欣躍之至

爲宰相賀連理木表

臣言今月二十六日得太清宮道士陳岳等狀稱聖祖殿



院東廊九靈門北有柰樹連理異枝還合者臣按漢武元狩元年得奇木枝旁出輒後數日越地及匈奴率眾來降者中興書云王者德澤純洽八方大同則木連理伏惟皇帝陛下體元以臨寶位法道以御太和孝通神明故祖宗禔福德合天地則草木呈祥至孝所感生靈遂性湛恩既溥異類懷仁大告休期累彰嘉瑞況我祖太清別殿奇樹効珍連理雙莖混成一體其同本也所以繁於眾枝其附內也所以慶於無外必有削衽之類亦表其強榦之休天下一家本支百代稽于圖傳可以明徵聖敬所臨神心允

答不然豈獨秀不遷之廟增華太素之宮曲折合符精靈  
相會耿光丕貺高映古今臣愧無黃老之術謬贊清虛之  
化獲奉休異喜萬恒情望請宣付史官編之簡冊無任欣  
抃之至謹奉表陳賀以聞臣某誠歡誠慶頓首頓首

中書門下賀芝草嘉禾表

臣等言伏見兵部尚書中書門下平章事李抱玉進芝草  
嘉禾者臣聞王者道洽則靈芝生天下和一則嘉禾應伏  
惟陛下誕膺景命憂濟生靈合太上之德感元精之氣天  
地氤氲神明滋液降此珍物叶於昌期垂蓋連莖三華煥

發離根合穎一穗孤秀沐我渥澤扇其祥風眾草之英百  
穀之長以兆稔歲以符太平昔周得唐郊之獻列篇於典  
策漢獲甘泉之祉薦歌於清廟三瑞之極一朝會同長發  
其祥無疆之慶臣等謬忝近侍幸覩休祥欣忭之情倍萬  
恒品無任歡忭之至

中書門下賀芝草表

臣某言今日中使吳承倩至宣示宋汴節度使御史大夫  
田神功所獻芝草一株紫蓋黃莖叢生者天生神物王者  
嘉瑞奇秀之狀靈篇未書伏惟陛下孝通神明德至草木

和氣所感禎祥屢彰煌煌靈芝郡國來獻垂以金蓋發其  
瓊葩爛然紫雲之色灼然紅蕖之秀土德斯應皇家永昌  
固可寫狀圖牒薦于郊廟祇奉天意贊揚鴻休臣等獲覩  
殊祥喜倍恒品無任慶抃之至

中書門下賀醴泉表

臣等伏以西京櫟陽縣有泉水於平地湧出潔誠飲者痼  
疾咸痊稽之圖牒是曰醴泉臣聞和氣上感湛恩下浹則  
有休徵以彰至化近在雨金之地特啓英泉之瑞無源獨  
湧平地滂流當神明之積高表陰陽之不測其氣香潔其

味甘醇抱華清而盪邪資靈化以除穢積年之疾一飲皆  
愈挈瓶而至重趼相望日以萬計酌而不竭齊莊之誠益  
厲神達之效愈彰伏惟陛下宏父母之深仁納黎元於壽  
域感此靈液助其生成疾苦假除天昏不作勿藥有喜愛  
人斯甚可以見天地之心可以明帝王之德昔唐堯至聖  
光武中興沛然發祥千歲一覩啓我昌運居然合符鴻休  
無疆天下慶幸臣等謬司近密喜倍常情無任忻慶之至  
中書門下賀文丹國獻白象表

臣等言今日內侍董秀至宣進止文丹國王來朝并獻

白象十一頭者臣聞春秋二百四十年不紀祥瑞而載異國之朝其在周書亦美西戎之獻蓋重其德化及遠天下大同也伏惟陛下以致敬事天地以致孝奉宗祀武功以定大難文德以懷遠人故舊典未載之邦前王不賓之長聲教所隔言語莫通悠悠南溟幾千萬里瞻望中國知有聖人踰海而來厯年方至紳冒重阻奔波載馳黃輅飾冠白璫玩耳伏柔羣象牽置闕前低迴馴擾稽顙屈膝隨萬國而來庭與百獸而率舞如知禮樂之節益盛羽儀之容有以彰仁化元通淳源洽暢至和大順以兆昌期事軼於

金史卷一百一十二  
三  
軒轅跡超於漢代矣臣等謬塵樞近獲覩鴻休伏請宣付  
史官光照簡冊無任慶抃之至

賀白鼠表

臣某言今日內常侍吳承倩宣恩命示臣咸陽縣所進白  
鼠臣聞王者將致無疆之休必有非常之應臣竊謂鼠者  
陰類四夷之象白者金精西方之色以西方陰類受制於  
近郊得非諸戎有納款之誠中國啟受降之兆也伏惟陛  
下俯憂黎獻控馭蠻夷能以禮綏孰云力競而晝伏夜動  
時擾於封疆乘障安邊尚勞於師旅今天且悔禍戎將感

恩方委貢於蠻邸遂呈祥於甸邑干戈既息已有明徵鳥  
雀之來多慙遠瑞臣等忝居近侍獲覩禎符歡抃之誠倍  
萬恒品

李採訪賀收西京表

臣聞夏歷其昌羿何逃罪漢維既振莽亦伏誅伏惟皇帝  
陛下恢正皇綱光膺帝業日月照其明畧雷霆發其英斷  
拯橫流而方割撲燎火之已焚頃者胡羯亂常峭函失守  
暴殄天物憑陵帝京上皇興避狄之仁陛下有蒙塵之難  
賴宸衷果決睿算昭宣憤陵寢之樵蘇悲黎元之塗炭必



將嘗膽誓使然臍不有殷憂何以啟中興之盛業不有患  
難何以彰撥亂之英哲步自郇邠至於朔漠撫巡城邑招  
致甲兵誥命俯臨三讓而登九五師徒走集一呼而踰百  
萬設壇拜將虛左迎師臨朝有怵惕之容率土下哀痛之  
詔六軍之號令既肅萬人之賞罰且明湯火不辭矢石何  
懼及清秋戒節太白方高爰整軍容順乎殺氣龔行天罰  
掃彼妖氛千里馳武之營百里龍蛇之陣沸若雲海聚如  
雪山壘揭終峯塹迴渭水闕軍聲而邱陵簸盪煬兵氣而  
天地晦冥蠢茲兇徒猶敢旅拒鼓譟白刃來聚犬羊之羣

旗靡黃塵旋就鯨鯢之戮渠魁不漏噍類無遺枝梧者面  
縛中軍顛背者頭懸後殿敗符融於肥水自可慙功破王  
邑於昆陽未云快意遂封尸於京觀旋振旅於王城啟闢  
千門掃除九陌拔羶腥於宮闕洗毒螫於閭閻耆艾歡迎  
久思周德衣冠雨泣還覩漢儀謳吟變噢咻之聲氣象迴  
嚴凝之慘廓丹霄以瞻羽衛肅黃道而復鑾輿正寶位於  
北辰道光主鬯迎上皇於西蜀歡展奉親永惟宗社之靈  
實荷乾坤之慶臣忝陪宗室喜萬恒情無任踴躍歡抃之  
至謹奉表陳賀以聞

賀劔南破西蕃表

臣某言今日伏見劔南西川節度使崔寧所奏露布十一月七日於劔南大破吐蕃斬首八千五百級生擒九百四十二人獲馬牛器械以千萬計者陛下以西戎負恩連歲設備近興武旅遠鑠王師故隴上或虞邛南每捷事同符契謀動鬼神凡在臣庶不勝慶快伏以西蜀一隅犬戎乘隙聖謀潛運藩帥龔行以我同力出其不意故得邊兵無遺鏃之費狂寇有輿尸之凶名王首將既充俘馘要塞堅城亦入封守神武之德莫測掃除之勢足徵天聲一臨風

動萬國則方隅不擾候我綏懷夷夏大同期於指掌臣等  
觀茲大捷愧乏嘉謀慶躍之誠實倍恒品

賀破山南賊表

臣某言中使某至示臣山南西道露布破吐蕃高安堡五  
百人又生擒堡使等七人又破急援兵馬二千餘人者大  
獲帥長驅其畜牧焚其資儲夷其堡隊獲覩慶捷喜倍恒  
情臣伏以秋成以來羣帥宣力陛下皆先授方畧合如符  
契以蕃醜東寇猶窺疆場受命獻恭掩征巢穴允膺密旨  
精擇奇鋒行於險中出其料外遂使恃固之壘遽復於隍

將領之渠盡衿其甲猶不悔禍更招援軍以犬羊恃眾之  
羣當貔武輕齎之旅雖終日猶鬪殲耗相仍而乘夕盡逃  
覆亡不暇聖謀方舉西候遂寧神算既行北郊以靖遠周  
萬里之外俯料四夷之情中詔是闕所征皆捷苟承成命  
皆可指期故叩道拜章於前漢池拜章於後復留睿畧更  
布新書軍中皆必勝之師天下無不賓之虜臣幸參樞近  
更乏嘉猷拜舞失容以慙以賀

爲崔中丞賀討田承嗣表

臣某言中使某至奉宣某月日勅承嗣本輔逆臣罪當參

夷陛下垂包荒之德開自新之路假以台袞冀其悛革豈  
謂豺狼之心飽而增兇動搖隣境慢易君命天下臣子雖  
扼腕攘臂願食其肉畏懼陛下不敢自發今陛下殷然震  
雷霆之怒下誅購之令戴髮橫目莫不憤激臣受國恩守  
在遠藩不得驅策騫蹇列於將臣巨猾之首竟爲他斷撫  
劒慙恥心魂馳越臣又知鯨鯢既盡蜂蠆自滅陛下垂衣  
裳以臨萬邦無爲之政行同大舜無任慶快感憤之至

賀張獻恭破賊表

臣某言今月中使某至伏蒙聖恩宣示山南西道節度使

檢校工部尚書張獻恭所奏露布破岷州吐蕃十萬餘衆  
生擒百餘人并獲牛馬及燒焚賊倉庫甲仗並盡者伏以  
吐蕃背恩負約屢擾邊陲惡稔禍盈自招喪敗聖謀潛運  
尅捷相仍自秋以來制勝非一頃則收功朔北今又獻凱  
山南皆陛下指授規模尅期進取遂令銜命之將感義之  
徒服順爭先奉詞掩襲未鼓而收城壘旣戰而殲寇戎策  
備火攻威同電掃迴軍乘勝又破柘川殺獲追擒不可勝  
數嘯聚之黨今已戮除噍類之餘自當殄滅廓清右地計  
日可期斯實皇威遠覃睿畧先定動罔遺策舉必有功臣

謬踐台陛親承睿算無任踴躍之至

賀聖躬痊復表

臣某言臣親奉聖旨伏承御膳過時微似煩熱臣等退用  
兢悸不安寢興齋居潔誠思獲休問適中使吳承倩至奉  
宣德音今已校退卿等不須憂者恭承睿旨俯協歡心欣  
抃失容蹈舞不足伏以陛下裁成二氣聽斷萬方每積憂  
勞載勤宵旰所以下祈人命上黷聖躬責在微臣退增兢  
懼今溽暑過候涼秋戒期方助穆清上滌元慮伏惟簡臨  
庶政保合太和以答天地穰穰之福以慰臣子禺禺之望



天下幸甚無任喜慶踴躍之至

百官賀佛放光表

臣等言今日董秀奉宣文成殿御功德佛放光明六宮及諸王公主并近侍等並觀其光從三更四點直至四更猶在臣聞明主之理本以庇人大聖之教先於及物合若符契感而遂通伏惟陛下以道法天以心證佛措六合于無事納羣生于慶門薰然慈心在宥天下滌慮恭默齊于穆清以四海之尊勤三乘之法故得大雄應見變化無方毫光破昏金殿如晝照恒星而奪彩混圓魄而一色曠代之

瑞天人咸覩玉漏將盡銀河以低仰光明而無際知皇劫之彌遠臣等謬忝樞近倍萬恒情無任慶抃之至

中書門下賀抑情復膳表

臣某等言中使吳承倩至奉宣進止以臣等所奏華陽公主初薨聖慈深悼抑情復膳保御至和伏惟陛下初以愛主幼沖純性聰敏思念之厚有過於成人疾病之憂非止於一日早齡遽失流痛兼哀臣等不安下情惶懼上請微誠感達蒙降德音而不以至愛之私忘於所寶之重推必然于大分割無益以遣懷用復常禮以勤庶政此則陛下

金史卷之三  
齊親疏於一致宏覆燾于萬邦契聖祖元元之符實天下  
蒼生之福臣等累日兢怖焦心失圖承命釋憂倍常慰幸  
無任感悅之至謹奉表陳賀以聞

李採訪請駕停金牛一日表

臣某言臣聞葵藿何稟猶每傾陽犬馬無知尚能戀主伏  
惟陛下迴鑾巴蜀指旆咸秦萬乘雷奔經劒門之險阻六  
宮雲從歷棧道以崎嶇恐天步有厭於登臨聖躬暫勞于  
行幸稍移玉輦將至金牛漢水梁城郡當所守蜀門秦塞  
路則居中乃微臣廁侍從之時宜陛下休羽儀之地伏望

小停仙蹕寬一日之程暨奉宸居喜千年之遇臣忝陪宗室得備藩條懇款之情倍萬恒品無任攀戀屏營之至奉表陳情以聞

爲宗正卿請復常膳表

臣某等言今月某日伏奉批詔以臣所請復常膳御正殿未賜允許者臣等恭承詔旨竊仰聖謀以爲前史所垂正言可取則應天動人之事實哲王致理之先然臣伏思陛下繼體以來推誠必至友愛之道顯教萬方惻隱之心罔遺一物於王師致討司寇用刑率皆毒被蒸人罪興眾怒

救殘虐之極弊懲悖亂之元兇而後効順立功報之爵祿  
勞心焦思痛在瘡痍屢降德音勤行王道得非應天以實  
而動人以行哉況謫見之後戒懼不遑朝野所知星辰所  
照則大官進御路寢燕居既舉舊章將踰期月固可以特  
開睿鑒俯循羣心理且叶於至公事兼存於大體臣某等  
謬居宗緒敢貢飾詞盡布腹心復于宸扆無任仰望兢越  
屏營之至

中書門下請進膳表

臣某言伏奉以華陽公主攝和稍乖思念所切齋官親禱

輟膳終朝臣等下情不遑寸刻竊以經時之疾變節或加分至所臨晦明異狀漸過其後旋即如初頃嘗驗之多亦然矣陛下以海內之眾子育寧殊豈天屬之間皇慈獨軫伏願忘懷澹慮常膳以時保安聖躬用慰臣下屬茲煩暑尤切懇誠謹奉表陳露以聞無任兢惶迫切之至

請入湯表

臣哀言臣先患腰膝比成積疾自從趨侍漸覺痊除每屬陰寒即微發動近加秋冷轉不支持半身風痺右足拘急謂其冷甚因以熱攻遂覺頭旋兼之眼暗寒溫相觸調息

實難伏蒙聖慈特賜醫藥殊造至深灰粉酬恩未申萬一  
生成之功雖則頓瘳積久之癥固難速效沈綿增劇憂懼  
失圖先因入湯常愈斯疾漸逼冬候今正其時伏望天恩  
許臣就湯將息駑駘蹇步冀効驅馳螻蟻微誠庶迴昭鑒  
無任懇迫之至謹奉表陳乞以聞

爲代宗告謝九廟表

臣某言臣纂承丕圖懼忝鴻業宵衣旰食寅畏增深未戢  
難于寰區恐獲戾於宗廟明發惕厲祈哀聖靈夢寐承顏  
如親左右謂臣曰知爾孝敬憫臣而降以恩私福及冲人

祐其後嗣德音所誨歎息如聞睿旨慈仁再三眷命追攀  
不逮哀慕難任欲報之恩昊天罔極無任荷恩摧咽之至  
謹奉表陳謝以聞臣某誠悲誠喜頓首頓首謹言